

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 4  
Pebrero 21, 2010  
[www.philippinerevolution.net](http://www.philippinerevolution.net)

*Editoryal*

## Mga rebolusyonaryong tungkulin sa panahon ng eleksyon


**A**ng mga eleksyon sa ilalim ng bulok na naghaharing reaksyunaryong estado at sistema ay huwad at palaging batbat ng anomalya at karahasan. Ang mga ito ay konsentradong paligsahan ng lakas, salapi at mga maniobra ng magkakapal na elitistang paksyon sa papet na reaksyunaryong paghahari. Karahasan, panunuhol at pandaraya ang pinakasusi sa likod ng tagumpay.

Hindi ito tunay na demokratikong proseso at hindi sumasalamin sa tunay na interes ng sambayanan.

Mistula itong malaking karnabal na pang-aliw sa mamamayan. Sinasamantala nito ang kanilang kahirapan at inaakit sila ng pera at ibang materyal na bagay para makuha ang kanilang boto. Ang pagboto nila ay nagagamit na palamuti para pagmukhaing demokratiko ang proseso. Habang napaaasa pa ang mamamayan sa mga reaksyunaryong eleksyon, malaking mayorya pa rin ang napalalahok dito.

Gayunman, sa limitadong antas na kakayanin sa ilalim ng reaksyunaryong estado at sistema, maaari at mahalaga pa ring masamantala ang mga reaksyunaryong eleksyon upang makakuha ng mga konkretong pakinabang sa interes ng mamamayan at ng rebolusyonaryong kilusan. Tungkulin ng mga rebolusyonaryong pwersa na masusing gabayan ang mamamayan sa pagkilos sa mga reaksyunaryong halalan.

Inilapat ng rebolusyonaryong kilusan ang dalawahang taktika sa mga panahon ng reaksyunaryong eleksyon. Saligang tungkulin nitong ilantad ang kahungkagan ng mga reaksyunaryong eleksyon at ang kabulukan ng kinapapalooban nitong sistema. Binibigyang-diin ang armadong pakikibaka bilang tiyak at pangunahing paraan ng pag-agaw sa kapangyarihang pampulitika upang makamit ang pundamental at ganap na panlipunang pagbabago.



***Mga tampok sa isyung ito...***

**Dalawang kaso ng pang-aagaw ng lupa**  
PAHINA 5

**Malawakang suporta sa Morong 43**  
PAHINA 7

**Usapang pangkapayapaan sa rehimen, sarado na**  
PAHINA 11


Kaalinsabay nito, sinasagpang din ng rebolusyonaryong kilusan ang mga pagkakataong ibinubukas ng eleksyon upang palawakin ang gawaing alyansa sa iba't ibang antas. Nakikipagkaisa ito sa mga kandidato at partidong handang magtaguyod sa demokratiko at patriyotikong interes at kagalingan ng bayan. Sa pagpwesto ng mga alyado at progresibo, naisusulong ang mga pakikibaka ng bayan sa loob ng parlamento. Nagagamit iyon sa pagpapalakas ng mga organisasyon at kilusang masa at napagsisilbi ang rekursong reaksiyunaryong estado para sa tuwirang pakinabang ng bayan. Sa kabilang panig, sinasamantala nito ang kontradiksyon sa hanay ng mga reaksiyunaryo upang lalong ihiwalay at birahin ang mga pangunahin at pusakal na kaway ng mamamayan at rebolusyon.

Pangmatagalan o panandalian man ang mga nabubuong alyansa sa mga panahon ng eleksyon, mahalagang maging tuluy-tuloy ang edukasyong pampolitika, pag-oorganisa at pagpapakilos sa mga pwersang nakikipagkaisa kahit tapos na ang mga eleksyon. Sa gayon, higit na mapauunlad ang rela-

syon sa kanila at maaasahan ang tuluy-tuloy nilang pakikipagtulungan sa rebolusyonaryong kilusan at sa mamamayan.

Sa panahon ng mga reaksiyunaryong halalan, tumatampok at pinangangalagaan ng mga rebolusyonaryong pwersa ang malawak na mga rebolusyonaryong erya na dinadayo ng mga pulitiko. Inoobliga ng mga rebolusyonaryong pwersa ang mga pulitiko na gumalang at sumunod sa batas at patakaran ng rebolusyonaryong gubyernong bayan. Ang pangangampanya sa loob ng mga rebolusyonaryong erya ay pinahihintulutan nang may mahigpit na mga kundisyon at pagkontrol laluna sa pagpasok at galaw ng mga armadong pwersa. Hindi hinahayaan ang mga pasista at sagadsaring reaksiyunaryo na magkalat ng kanilang propaganda, maniktik at manligalig sa mga lugar na ito.

Tampok sa kasalukuyang eleksyon ang paglahok ng mga progresibong kandidato at partido. Isinasagawa nila ang malawakang kampanya ng pagpukaw, pag-oorganisa at pagpapakilos sa masa bilang paraan upang abutin ang milyun-milyong mamamayan. Sa pamamagitan nito, ibayong lumalawak ang



kanilang impluwensya at organisasyon at naitataas ang kakayahan ng mamamayan na labanan ang naghaharing reaksiyunaryong rehimen at buong bulok na sistema.

Ito ang dahilan kung bakit gaano na lamang ang interes ng mamamayan na kumilos at suportahan sila sa kabila ng maraming balakid. Sa mga nagdaang taon, mabisa nilang nagamit ang parlamento katuwang ng demokratikong kilusang masa upang itaguyod ang pambansa-demokratikong adhikain at interes ng mamamayan sa kabila ng pagiging napakaliit na minorya. Kaya naman puspusan ang mga sagadsaring reaksiyunaryo na hadlangan ang pagsisikap ng mga progresibong partido. Pangunahing target ng pasistang mga atake ang mga progresibong lider, aktibista at tagasuporta nila. Target din sila ng sistematikong pandaraya.

Sa harap ng pagkakasa ng *automation* ng halalan sa Mayo, maaaring maging mas masahol habang mas sopistikado ang gagawing pandaraya.

Sa gayon, kailangang mas matalino, planado, koordinado at sistematiko ang pagkilos ng mamamayan at ng kanilang mga progresibong pwersa upang harapin, ilan-tad at sikaping masagkaan kapwa ang pandaraya at mga pasistang atake laban sa kanilang hanay.

Nagaganap din ang kasalukuyang eleksyon sa harap ng pagpu-



Taon XLI Blg. 4 Pebrero 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editorial

Mga rebolusyonaryong tungkulin sa panahon ng eleksyon	1
Laban sa pagpalya ng eleksyon	3
Pinalobong badyet kinundena	4
Dalawang kaso ng pang-aagaw ng lupa	5
Importasyon ng asukal	6

### Pananalanta ng pasistang estado

Malawakang suporta sa Morong 43	7
---------------------------------	---

### Matatagumpay na opensiba ng BHB

Bira ng BHB sa Kalinga	10
Mga opensiba sa iba pang rehiyon	10

Usapang pangkapayapaan sa rehimeng Arroyo, sarado na	11
--	----

Mga kasinungalingan ng Nolcom,	11
--------------------------------	----

<b>Balita</b>	12
---------------	----

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

pumilit ng naghaharing rehimeng US-Arroyo na makapangunyapit sa poder at makaiwas na harapin ang napakarami nitong mabibigat na krimen sa bayan. Lalo itong tumitingkad ngayong ibayong lumalala ang kahirapan, kaapihan at diskuntento ng mamamayang hinahambalos ng napakatinding krisis pangkabuhatan at mga pasistang atake. Pinalalakas nito ang hinaing ng mamamayan na ibsan ang kanilang kahirapan at kaapihan at magkaroon ng makabuluhang pagbabago sa bansa. Ibinubukas nito ang pagkakataong makipag-alyansa sa mga partido at kandidatong kalaban ng pangkating Arroyo at papet na paghahari, gayundin, sa mga handang makipagtulungan sa pagtataguyod sa mga batayang interes at pagpapagaan sa mabigat na mga pasanin ngayon ng mamamayan.

Dapat ding ilantad at birahin ang mga partido at kandidato, maging ng oposisyon, na marami ring mabibigat na kasalanan sa mamamayan. Dapat ilantad ang mga tahasang nagtutulak ng mga patak-

rang yumuyurak sa karapatan at interes ng mamamayan. Dapat ilantad ang kahungkagan ng programa ng mga partidong nambobola lamang. Dapat batikusin yaong mga partidong lalo lamang magpapahirap sa mamamayan at aatake sa kanilang rebolusyonaryong kilusan, oras na makapwesto sa kapangyarihan.

Habang nagaganap ang reaksiyunaryong eleksyon, dapat patuloy na paigtingin ang mga taktikal na opensiba at bigyan ng partikular na pansin ang pagbira sa mga pinuno ng pasismo at terorismo. Sa panahon ng eleksyon, mahalagang bigyan ng higit na diin ang paglulunsad ng mga taktikal na opensiba laban sa pinakasagadsaring reaksiyunaryong mga pulitiko at mga armadong galamay nila, at laban sa pinakamalalaki at kinamumuhang mga mandarambong, mangungurakot at may mga utang na dugo sa rebolusyon at mamamayan.


Kaalinsabay nito, dapat mapaghandaan din ang malaking posibili-

dad ng malawakang pandaraya, pananabotahe at pagbiga sa eleksyon, hanggang sa pagpapataw ng "emergency rule," "pamumunong transisyon" o tahasang batas militar at iba pang marurumi at marahas na pakanang niluluto ng naghaharing rehimen. Dapat mabilis at epektibong mapamunuan ng Partido at mga rebolusyonaryong pwersa ang nagbabadyang pagbulwak ng mas malawakang direktang paglaban ng mamamayan na maaaring humantong sa mga pag-aalsa at paggigiit ng kapangyarihang bayan.

Matuloy man o hindi ang eleksyon, anupaman ang ireresultang sitwasyon pagkatapos ng Mayo 2010, tiyak na magpapatuloy ang pagkulo ng diskuntento ng masa at alitan ng mga reaksiyunaryo. Dapat palaging maging alerto sa bawat pihit ng sitwasyon at pag-ibayuhin ang pleksibilidad at inisyatiba para masagpang ang mga oportunidad para mamayani at lalong makapagpalakas ang mamamayan at mga rebolusyonaryong pwersa. **AB**

## Kontra-Daya, nagbabala laban sa pagpalya ng eleksyon

**K**inakailangan ang pagkilos ng mamamayan sakaling pumalya ang eleksyon sa Mayo o kaya'y ipataw ang batas militar bunsod nito. Ito ang pinagkaisahan ng mga nagtatag sa Kontra-Daya 2010, isang malawak na koalisyon ng mga taong simbahan, guro,



mga eksperto sa *information technology* (IT), mga estudyante, mga aktibista at iba pa na may layong magkaroon ng kapani-paniwala at walang dayaang halalan sa darating na Mayo. Inianunsyo ang pagbubuo ng Kontra-Daya sa Intramuros, Maynila noong Pebrero 17.

Kabilang sa mga nag-buo ng Kontra-Daya 2010 sina Fr. Jose Dizon ng Solidarity Philippines, Sr. Mary John Mananzan ng Association of Major Religious Superiors of the Philippines (AMRSP), Bishop Elmer Bolocan, Archbishop Oscar Cruz, manunulat at artistang si Bibeth Orteza, Grace Poe-Llamanzares, syentistang si Prof. Giovanni Tapang, Atty. Harry Roque, Henri Khan, Bettina Legarda, Fernando Gaithe ng COURAGE at Renato Reyes ng Bagong Alyansang Makabayan (BAYAN).

Anang koalisyon, lumilinaw ang mga palatandaan ng pagpalya ng eleksyon dahil sa nagpapatuloy na mga problema sa pinakaunang paggamit ng kompyuter sa pagboto at bilangan. Nadagdagan pa ang prob-

lemang ito nang aminin ng National Power Corporation ang malaking problema sa kakulangan ng suplay ng kuryente bunsod ng tagtuyot sa bansa.

Palagi ring itinutulak ng mga alipures ni Gloria Arroyo tulad ni Defense Sec. Norberto Gonzales na si Arroyo ang magsisilbing “pangulong pantransisyon” kapag naganap ang gayong senaryo. Isinusulong din ni Senate Pres. Juan Ponce Enrile ang kanyang ideya na kung magkagayon man, isinasaad umano ng bagong konstitusyon na ang Armed Forces of the Philippines at Philippine National Police ang siyang papapel bilang *officer-in-charge* (OIC) at siyang pipili kung sino ang magiging pansamantalang pangulo ng bansa.

Ani Reyes, sakaling magkatotoo ang masasamang pangitaing ito, nakahanda ang BAYAN na pakilusin ang malaking bilang ng mamamayan para biguin ang imbing pakang ito.

Gumawa ang Kontra Daya 2010 ng *website* ([www.kontradaya.org](http://www.kontradaya.org)) para masubaybayan ng mamamayan ang mga usapin sa eleksyon. Hini-mok din nito ang publiko na magpadala ng mga ulat sa pamamagitan ng [kontradaya@gmail.com](mailto:kontradaya@gmail.com). **AB**

## Pinalobong badyet, kinundena

**M**aring kinundena ng iba’t ibang sektor ang patagong pagsisingit ni Gloria Arroyo at ng kanyang mga alipures sa Kongreso ng P119 bilyong “di programadong pondo” para sa presidente at P64.6 bilyong dagdag na *pork barrel* sa pambansang badyet para sa 2010.

Pinirmahan ni Arroyo noong Pebrero 10 ang badyet para sa 2010 na umabot sa P1.54 trilyon, mas mataas nang 8% (P115 bilyon) kumpara sa badyet para sa 2009. Hindi kasama sa badyet na ito ang mga isiningit na pondo kaya sa katunayan, umaabot sa P1.723 trilyon ang inaprubahang badyet ni Arroyo.

Ginawa ang mga pagsisingit sa pulong ng Bicameral Conference Committee na siyang nagpipinal ng mga batas bago ito isumite para pirmahan ni Arroyo. Nais sana ng mga kongresista na kunin mula sa nakalaang pambayad ng utang ang P64.6 bilyong dagdag na *pork barrel*. Tumanggi si Arroyo na bawasan ang nakalaang pambayad ng utang pero hindi niya tinanggal ang mga proyektong nagpapalobo sa *pork barrel* at ang sarili niyang pondo. Aniya, ang mga mambabatas na ang bahalang magpalitaw ng rebenyu para magkaroon ng pondo para rito. Magagawa nila ito sa pamamagitan ng dagdag na pangungutang at pagpapataw ng karagdagang mga buwis. Ito’y sa gitna ng napakabigat nang mga buwis na pinapasan ng mamamayan at matinding krisis sa ekonomya.

Samantala, nakapaloob sa inaprubahang badyet para sa 2010 ang probisyong *anti-impoundment*, na mag-aalis ng kapangyarihan sa susunod na presidente na kontrolin ang pondong *pork barrel* ng mga kongresista. Ang kapangyarihang ito ang ginagamit ni Arroyo upang paboran ang mga kaalyado niya para makapagpasasa sila sa *pork barrel*. Sa kabilang banda, iniipit naman niya ang *pork barrel* ng mga nasa oposisyon. Mula pa noong 2005 ay wala nang ibinabahagi kahit isang kusing sa mga progresibong kongresista at iba pang pinakamasusugid na lumalaban kay Arroyo. **AB**

## Pagsasara ng pabrika sa Cebu, tinututulan ng mga manggagawa

TINUTUTULAN ng mahigit 100 manggagawa ang planong pagsasara ng Alta Mode Incorporated, isang pagawaan ng damit sa Mactan Export Processing Zone (MEPZ) II sa Lapu-Lapu City, Cebu. Nakatakda silang maglunsad ng kilos protesta sa Pebrero 23 para mapigilan ang pagsasara ng pabrika.

Ang Alta Mode Incorporated ay subkontraktor at tagaeksport ng mamahaling damit na may tatak tulad ng Abercrombie and Fitch.

Noong Pebrero 11 ay nagsampa na ng *notice of strike* ang mga manggagawa sa National Conciliation Mediation Board sa Cebu City makaraang ihayag ng kumpanya na magsasara ito. Sinundan ito ng isang rali noong Pebrero 15 ng mga kasapi ng Alta Mode Workers’ Union dahil pinagbabawalan na silang pu-

masok sa MEPZ II tatlung araw bago ang pagsasara ng pagawaan. Nakatakda itong magsara sa Marso 15.

Idinadahilan ng kumpanya sa mga manggagawa na nalulugi ito kaya ititigil na ang operasyon nito. Ngunit ayon kay Renante Palino, presidente ng unyon, ang totoong dahilan ay ayaw nitong harapin ang mga manggagawa na naggigiit ng kanilang mga karapatan at kagalingan.

Mula nang mag-opereyt ang kumpanya sa MEPZ II noong 1999 ay unti-unti nang tinatanggal ang mga benepisyo ng mga manggagawa tulad ng 13th *month pay*. Bunsod nito ay nagbuo ng unyon ang mga manggagawa, na tinangkang buwagin ng maneydsment ng kumpanya. **AB**

# Dalawang kaso ng pang-aagaw ng lupa, isiniwalat

**P**atunay na naman ng kainutlan ng Comprehensive Agrarian Reform Program (CARP) ang dalawang kaso ng pang-aagaw ng lupa sa Bulacan at Leyte. Parehong nakapailalim sa CARP ang naturang mga lupa subalit binabalewala ito ng mga mangangamkam na nasa kapangyarihan.

**Inaangkin para umano sa proyekto pangkalikasan.** Mahigit 30 taon nang pinaunlad ng 230 pamilyang magsasaka ang 375 ektaryang mga palayan at maisan sa Sityo Malapad, Barangay Sibul, San Miguel, Bulacan. Hawak ng mga magsasaka ang mga Certificate of Land Ownership Award (CLOA) bilang mga benepisyaryo ng CARP. Ngunit nangangamba sila ngayon na mababalewala ito dahil inaangkin ang malawak na lupaing ito ng pamilya ni Rep. Luis Villafuerte (Camarines Sur, 2nd District).

Ayon sa Lingap Magsasaka, isang organisasyong kaanib ng Kilusang Magbubukid ng Pilipinas (KMP), mula noong Abril 2009 ay tatlong beses nang pumunta sa lugar sina Villafuerte at mga tauhan niya.

Nagpatawag ng pulong ng mga magsasaka si Villafuerte sa una niyang pagdalaw sa Sityo Malapad. Nagpakot ang mambabatas ng mga papel para lagdaan at sinabing ito ay *attendance sheet* lamang. Huli na nang kanilang mapagtanto na iyon pala ay kasunduan ng "donasyon." Ibig sabihin, nabigay nila nang walang bayad ang ilandaang ektaryang lupa na binubungkal nila sa isang pangkalikasang proyekto ng Good Earth. Ang Good Earth ay isang *foundation* na pinamumunuan ng anak ni Villafuerte na si Mylene Villafuerte-Matti at asawa nitong si James Matti. Nanaig din ang takot sa mga

magsasaka dahil pinaliligiran sila noon ng mga tauhang militar na kasama ni Villafuerte.

Nang bumalik sa lugar si Villafuerte ay hinikayat niya ang mga magsasaka na maging manggagawang bukid na lamang ng Good Earth. Magtatanim na lamang umano sila ng mga kawayan at iba pang *cash crop* sa halip na palay at mais.

Sa ikatlong pagkakataon, ang pumunta ay ang anak at manugang ni Villafuerte na may kasa-kasamang mga Scout Rangers ng Philippine Army. Sinarbey nila ang lugar, nilagyan ng mga muhon, itinumba ang malalaking punong kahoy at pinalitan ng mga bagong kahoy at kawayan.

Sa laking galit ng mga residente, hindi sila sumipot sa pulong na ipinatawag ng mga Villafuerte.



**Dating huwes, nang-agaw ng lupa sa Leyte.** Inaagaw naman ni dating Court of Appeals Justice Vicente "Cheng" Veloso ang 429 ektaryang lupang agrikultural na sinasaka ng 144 magsasakang mga benepisyaryo ng CARP. Ang lupaing ito ay estratehikong nakalatag sa hangganan ng mga bayan ng Alang-alang at San Miguel at ng Tacloban City sa Leyte.

Binubungkal na ng mga magsasaka ang nasabing mga lupain mula pa noong dekada 1930, ayon sa pananaliksik ng Samahan han Gudi nga Parag-uma sa Sinirangan Bisayas (SAGUPA-SB), panrehiyong organisasyon ng mga magbubukid sa Eastern Visayas. Noong 1974, sa bisa ng PD 625 ay ipinailalim ang lupa sa pangangasiwa ng Leyte Sab-a Basin Development Authority (LSDA). Sinaklaw ng LSDA ang 3,000 ektarya sa mga bayan ng Jaro, Alang-alang, Sta. Fe, Palo, Barugo, Babatngon at San Miguel at ang lunsod ng Tacloban. Umaabot naman sa 8,000 ektaryang lupang agrikultural sa mga bayang nabanggit ang sinaklaw ng CARP.

Noong 1991, ginawaran ng CLOA ang mga magsasaka ng Alang-alang ngunit noong 2001 ay kinansela ito ng Department of Agrarian Reform (DAR). Pumasok sa eksena si dating Justice Veloso

noong 1997 nang angkinin niya ang mga titulo ng lupa para sa kanyang mga kapamilya at kamag-anak at palayasin ang mga magsasaka gamit ang mga armadong

goons na nagpakilalang mga pulis. Tinutukan ng mga

goons ang mga magsasaka at sinabihan silang huwag nang magtanim ng niyog. Plano ni Veloso na tamnan ang lugar ng mga punong kahoy na ibebenta sa National Power Corporation (NAPOCOR).

Idinulog ang kaso sa Department of Agrarian Reform Adjudication Board (DARAB). Ngunit noong 2002, nagbaba ng desisyon ang

DARAB pabor kay Veloso. Hindi lamang ang mga magsasaka sa Alang-alang ang pinalayas kundi pati na rin ang mga magsasaka sa katabing mga bayan.

Naglunsad noong Oktubre 2009 ng pagsisiyasat ang SAGUPA-SB kasama ang KMP at mga partidong Anakpawis at Bayan Muna. Naki-pagdayalogo sina Rep. Rafael Ma-

riano ng Anakpawis, Rep. Teddy Casingo ng Bayan Muna at iba pang delegado sa DAR Region 8 at iba pang ahensya ng gubyrerno. Walang ebidensyang nagpapatunay na pag-aari ni Veloso ang lupa.

Nangako ang mga upisyal ng DAR na magsasagawa rin sila ng pagsisiyasat pero hanggang ngayon ay wala pa ring nangyayari. **AB**

## Importasyon ng asukal, tinututulan

**T**inututulan ng iba't ibang sektor sa industriya ng asukal ang inianunsyong pag-import ng gubyrerno ng asukal sa harap ng umano'y kakulangan ng suplay ng asukal sa bansa. Plano ng gubyrerno na umangkat ng 150,000 metriko toneladang asukal para mapababa umano ang nagtataasang presyo ng asukal sa lokal na merkado.

Kabilang sa maring tumututol sa importasyon ng asukal ang mga organisasyon ng mga manggagawang bukid at manggagawa sa sentral, mga drayber, kargador at iba pang ineempleyo ng industriya ng asukal. Nagpahayag rin ng pagtutol ang pamahalaang panlalawigan ng Negros Occidental, ang prubinsyang pinakamalaking prodyuser ng asukal sa buong bansa.

Nagkakaisa ang naturang mga sektor na makasama sa industriya ng asukal at sa ekonomya ng bansa ang pag-aangkat ng asukal. Hindi maeengganyo ang mga may-ari ng tubuhan na mamuhunan dito. Magiging palaasa ang bansa sa inaangkat na asukal gaya ng nangyari sa bigas. Masasalanta nito ang hanapbuhay ng anim na milyong magsasaka sa 17 prubinsya na nagtatanim ng tubo.

Ayon sa pananaliksik ng IBON Foundation, ang biglaang pagtaas ng presyo ng asukal sa lokal na pamilihan ay ibinunsod ng pagbawas sa suplay para sa lokal na konsumo bunga ng bultuhang pag-eksport ng 137,000 metriko toneladang asukal sa US noong Enero. Ang iniluwas na asukal ay 86% ng 158,906 metriko toneladang kota ng Pilipinas sa US para sa taong ito. Sa halip na unti-unti itong ieksport buwan-buwan hanggang sa mapunuan ang kota, bultuhan itong iniluwas para masagpang ng mga negosyante ang mataas na presyo ng asukal ngayon sa pandaigdigang pamilihan.

Dahil dito ay nakaltasan nang malaki ang suplay na nakalaan para sa lokal na konsumo at sumirit ang presyo ng asukal sa mga lokal na pamilihan. Panguna-



hing nakinabang dito ang mga negosyanteng pinapaboran ng rehimeng Arroyo mula sa Negros, Pampanga at Tarlac.

Para naman maibsan ang ibinunga nitong kakulangan sa suplay, mag-aangkat ang gubyrernong Arroyo ng 150,000 metrikong tonelada ng asukal na walang taripa. Ayon kay Jose Maria Montinola, tapapangulo ng Victorias Milling Corp. Farmers' Multipurpose Cooperative, P2.103 bilyon ang mawawalang pondo ng gubyrerno sa binabalak na importasyon. Ang naturang pondo ay kakaltasin sa "tax expenditure subsidy" (TES) na dapat sana ay nakalaan para sa mga serbisyong panlipunan para sa mga magsasaka sa tubuhan.

Patung-patong ngayon ang kita ng mga negosyanteng kasapakat ng pangkating Arroyo na kumita na sa bultuhang pag-eksport ng asukal at ngayo'y kikita muli ng limpak-limpak sa pag-import na naman ng asukal. **AB**



# Malawakang suporta sa Morong 43

**P**atuloy na lumalawak ang suporta sa 43 manggagawang pangkalusugan na ilegal na inaresto at tinortyur noong Pebrero 6. Ang ilegal na pag-aresto ng 2nd Infantry Division ng Philippine Army ay naganap sa bahay-bakasyunan na pag-aari ni Dr. Melecia Velmonte sa Morong, Rizal habang ang 43 ay nagsasagawa ng pagsasanay-medikal para sa kanilang mga gawaing pangkalusugan sa mga komunidad. Si Dr. Velmonte ay konsultant ng Philippine General Hospital at *professor emeritus* sa University of the Philippines College of Medicine.

Kabilang sa mga ilegal na inaresto ang mga doktor, nars, komadrona at mga *community health volunteer* na nagsasanay sa magkasanib na pangangasiwa ng Council for Health and Development (CHD) at Community Medicine Development Foundation (COMMED). Ang CHD at COMMED ay kapwa mga *non-government organization* na nagbibigay ng serbisyong pangkalusugan at pagsasanay-medikal sa mga maralitang komunidad.

Isang batalyon ng mga sundalo mula sa 202nd Infantry Brigade kasama ang lokal na pulisya ang nagsagawa ng reyd. Ginamit sa pag-aresto sa mga manggagawang pangkalusugan ang apat na siksbay, dalawang *armored personnel carrier* at iba pang sasakyang walang plaka o identipikasyon.

Depektibo ang mandamyento de aresto na ginamit sa operasyon. Nakasaad rito ang pangalan ng isang "Mario Conde" na hindi kilala sa bahay-bakasyunan at sa komunidad na kinalalagyan nito. Nagtanim din ng mga baril, granada, bomba at mga sangkap sa paggawa ng bomba ang militar at pulisya sa bahay bakasyunan para palabasing mga kasapi ng Bagong

Hukbong Bayan (BHB) ang 43. Ipinagpipilitan ng militar na mga dokumento sa paggawa ng bomba ang natagpuan nila sa lugar imbes na mga materyales sa pagsasanay-medikal.

Idinetine ang 43 sa Camp Capinpin, hedkwarters ng 202nd Bde. Dalawang araw na hindi pinayagang makipag-ugnayan sa kanilang mga pamilya at abugado ang 43 manggagawang pangkalusugan.


Mas masahol pa, dumanas ng tortyur at sekswal na harasment ang mga biktima sa kamay ng militar. Sa loob ng 36 oras, nakaposas, nakapiring at tinortyur ang 43. Hindi sila binigyan ng sapat na pagkain at kalayaan sa paggamit

ng banyo. Kapag gagamit ng banyo, may sundalong maghuhubad ng kanilang panloob. May pagkakataong hinawakan ng mga sundalo ang maseselang bahagi ng katawan ng ilan sa mga babaeng bihag nila.

Pinagbawalan din ang mga biktima na matulog at mag-usap. Inilagay sila sa madidilim na selda at pwersahang pinakikinig sa naglalakasang tunog ng mga putok ng baril. Pinagsasampal din sila. Pwersahan silang pinaaaming mga kasapi ng BHB. Ang ilan sa mga biktima ay nagkandasugat-sugat na ang braso dahil sa matagal na mahigpit na pagkakaposas. Ang isang babaeng biktima ang ibinilad sa init ng araw nang malamang siya'y nireregla.

Isa sa mga biktima, si Dr. Alex Montes, 62, ay inakusahan ng militar na kabilang umano sa espesyal na yunit ng BHB na ipinadalaraw para patayin si Ret. Gen. Jovito Palparan. Kinuryente at paulit-ulit na hinahampas ng kahoy sa dibdib si Dr. Montes. Pinatayo rin siya sa gilid ng bangin at binugbog para paamining kasapi ng BHB.


Nang mag-isyu ng *writ of habeas corpus* ang Korte Suprema noong Pebrero 10, walang kahihiyan itong binalewala ng pamunuan ng militar. Hindi tumalima ang militar sa kautusang ipresenta sa korte ang 43. Kakatwang idinadahilan ng militar na mahirap at delikado ang pagbibyahe ng sa mga detenido mula sa Camp Capinpin sa Tanay, Rizal patungong Maynila dahil ma-





syado silang marami at may panganib na agawin sila ng BHB sa daan.

Patuloy ang pagdami ng mga kumukundena sa pagkakaaresto ng 43 manggagawang pangkalusugan at nananawagan para palayain sila. Kabilang dito ang United Methodist Church California-Pacific Conference, World Council of Churches, Caritas Aotearoa, Philippine Nurses Association, UP College of Medicine, Alliance of All Health Organizations of the Nation, Alliance of Concerned Teachers, UP-Manila Student Council, mga estudyante sa medisina ng Trinity University of Asia, Philippine Solidarity Network of Aotearoa, BAYAN-USA, Migrante-Middle East at marami pang iba. Sa pagkabahala rin ng International Committee of the Red Cross sa nangyari sa 43, binisi-



ta nila ang mga detenido, inalam ang kanilang kalagayan at siniyasat ang pagtortur sa kanila.

Samantala, nagpahayag ng pagkabahala ang Laguna Medical Society dahil mula nang mahuli ang 43 manggagawang pangkalusugan sa Morong ay nag-aatubili na ang mga nars at *health volunteer* na sumama sa mga misyong medikal sa mga liblib na lugar sa takot na maparatangan silang myembro o simpatisador ng BHB.

Sinabi rin ng CHD na nadiskaril ang mga programang pangkalusugan nito para sa mga maralitang komunidad dahil sa pagkakakulong ng mga kawani nito, Nakatakda sanang maglunsad ang CHD ng misyong medikal sa Palawan na pakikibangan sana ng 3,000 myembro ng tribong Tagbanua. AB

### Pagpapalaya sa aktibistang magsasaka, iginigiit

IGINIGIIT ng mga kasapi ng iba't ibang grupong sektoral sa rehimeng Arroyo ang kagyat na paglalya ni Cirila Estrada, 49, isang aktibistang magsasakang iligal na inaresto ng pinagsanib na mga pwersa ng militar at pulis sa Iloilo City noong Pebrero 12. Si Estrada ay papunta sa kanyang duktor sa lunsod nang bigla na lamang siyang hablutin ng mga ahente ng militar, piringan at sapilitang isakay sa isang *van*. Si Estrada ay myembro ng Paghugpong sang mga Mangunguma sa Panay kag Guimaras (PAMANGGAS), isang organisasyon ng mga magsasaka sa Panay.

Upang igiit ang pagpapalaya kay Estrada, naglunsad ng mobilisasyon sa Iloilo City ang mga kasapi ng KARAPATAN, Makabayan, Gabriela, BAYAN-Panay at PAMANGGAS noong Pebrero 16. Kinabukasan, pumunta sila sa Iloilo Rehabilitation Center (IRC) kung saan ikinulong si Estrada para kausapin ang *provincial warden* tungkol sa kanyang seguridad at kaligtasan.

Si Estrada ay aktibo noong panahon ng diktadurang Marcos sa pakikipaglaban para sa interes

ng mga magsasaka bago siya maging boluntir ng PAMANGGAS. Nasa Iloilo City siya noon para bumili ng gamot at magpatingin sa doktor dahil sa sakit sa atay. Mayroon din siyang hika.

Anang mga aktibista, ang iligal na pag-aresto kay Estrada ay nagpapakita ng padron ng panggigipit sa mga kasapi ng mga progresibong organisasyon habang papalapit na ang eleksyon, tulad ng nangyari sa 43 manggagawang pangkalusugan na iligal na inaresto sa Morong, Rizal nitong Pebrero at sinampahan ng mga gawa-gawang kaso. Tinukoy nila na panahon din ng eleksyon noong 2007 nang dukutin ng mga operatibang militar sina Luisa Posa-Dominado ng SELDA-Panay at Nilo Arado, tagapangulo ng BAYAN-Panay at isa sa mga nominado ng partidong Anakpawis.

Nangangamba ang mga aktibista na ang pag-aresto kay Estrada ay simula na ng mas marami pang pang-aatake sa mga progresibong organisasyon at sa mga sumusuporta sa mga militanteng grupo. AB





## Paglabag sa karapatan ni Ka Jinggoy, kinundena ng NDFP

**M**ariing kinundena ng *negotiating panel* ng National Democratic Front of the Philippines (NDFP) ang paglabag ng AFP sa mga karapatan ni Kasamang Elizalde "Ka Jinggoy" Cañete bilang isang sugatang bihag na wala nang kakayahang lumaban sa ilalim ng Internasyunal na Makataong Batas.

Si Ka Jinggoy ay nadakip matapos magkalabanan ang BHB at mga elemento ng 3rd Special Forces Battalion ng Philippine Army sa Barangay Sarmiento, Laak, Compostela Valley. Si Ka Jinggoy ay may mga tama ng bala nang mada-  
kip noong Enero 30.

Unang dinala sa Camp Panacan Naval Hospital si Ka Jinggoy bago siya dinala sa Davao Medical Center para maoperahan noong Enero 31. Tatlong araw pa lamang matapos

maoperahan, pwersadong inilipat si Ka Jinggoy pabalik sa Camp Panacan Naval Hospital mula DMC. Wala itong kautusan mula sa korte at labag sa payo ng kanyang doktor. Binalewala ng militar ang protesta ng kanyang ina at kapatid na babae.

Nag-aalala ang pamilya ni Ka Jinggoy sa kanyang kundisyon sa ospital na pangmilitar. Nanginginig pa si Ka Jinggoy nang ilipat siya dahil sa matinding lagnat. Maga rin ang kayang tiyan at maputla't naninilaw ang kanyang katawan. Nahihirapan siyang huminga at madalas magmungkahi ng *oxygen*.

Tahasang paglabag sa kanyang mga karapatan sa ilalim ng Internasyunal na Makataong Batas ang sapilitang paglipat kay Ka Jinggoy na labag sa payo ng doktor na nag-

opera sa kanya at ang tahasang pagbalewala ng militar sa kanyang pisikal na kalagayan. Isinasaad sa Internasyunal na Makataong Batas na ang mga sugatang *hors de combat* ay dapat gawaran ng espesyal na proteksyon, bigyan ng kinakailangang pangangalagang medikal at hindi dapat maltratuhin sa anumang paraan. Niyurakan din ng militar ang Comprehensive Agreement on Respect for Human Rights and International Humanitarian Law (CARHRIHL) sa pagitan ng GRP at NDFP.

Noong Nobyembre 28, 2009 ay pinatay ang ama ni Ka Jinggoy ng mga pinaghihinalaang ahente ng 7th Special Forces ng 25th IB. Huling nakita ang ama ni Ka Jinggoy na kausap ang mga ito bago siya matagpuang patay at tadtad ng tama ng bala kinabukasan. **AB**

## Panggigipit sa mga lider aktibista sa Aklan, kinundena

KINUNDENA ng mga kasapi ng mga progresibong organisasyon sa Aklan ang pagsasampa ng kasong kriminal laban sa ilang mga kasapi nito. Sa isang rali noong Pebrero 16 na idinaos sa tapat ng Municipal Trial Court sa Kalibo, binatikos nila ang pag-isyu ng mandamyemto de aresto laban kay George Calaor, tagapagsalita ng Bagong Alyansang Makabayan (BAYAN)-Aklan at iba pang mga aktibista bilang bahagi ng panggigipit ng rehimeng Arroyo sa mga kritiko nito.

Ang iba pang inisyuhan ng mandamyemto de aresto ay sina Nenita Tugna, tagapagsalita ng Kalipunan ng Damayang Mahihirap-Aklan, at mag-asawang Remy at Norma Zaldivia, mga residente ng isang maralitang komunidad sa Kalibo. Hindi ikinulong sina Calaor at Tugna dahil nakapaglagak sila ng pyansa ngunit nakapiit ang mag-asawang Zaldivia.

Sina Calaor at Tugna ay nagsilbing negosyador sa pagitan ng mga residente at mga pulis ng Kalibo na nagpapatupad ng *demolition order* sa komunidad sa Laserna St. sa Kalibo. Hinihiling nina Calaor na ipatupad muna ang RA 9279 na nagsasaad na dapat may *relocation site* munang nakahanda para sa mga residente bago ipatupad ang anumang demolisyon. Nang ituloy pa rin ang demolisyon sa pamamagitan ng paggiba sa bahay ng mga Zaldivia ay lumaban ang mga residente. **AB**

## Pagdukot at pamamaslang sa Albay

MARIING kinukundena ng NDF-Bicol ang sunud-sunod na pagdukot at pamamaslang ng 2nd IBPA at 901st Brigade sa mga inosenteng sibilyan sa prubinsya ng Albay.

Hapon ng Pebrero 7 nang matagpuan ang naaagnas nang mga bangkay ng mga magsasakang sina Ananias Cardiente Jr. at Vicente Moradillo. Dinukot sila noong Enero 15 ng mga elemento ng Special Operations Team (SOT) ng 901st Brigade sa Barangay Taplacon, Camalig. May mga bakas ng tortur ang bangkay ng dalawang biktima.

Binaril at pinatay ng mga sundalo ang sibilyang si Vergel Mapola Catubig sa isang pistahan sa Barangay Lawinon, Pio Duran noong Enero 30. Isa pang sibilyan sa Camalig ang dinukot, ginilitan ang leeg at pinatay. Natagpuan ang bangkay niya sa bayan ng Jovellar.

Bahagi ang mga insidenteng ito ng taktikang teror at maruming saywar na sistematikong ginagamit ng 901st Brigade para maghasik ng takot sa mamamayan. **AB**



## Opensiba ng BHB sa Kalinga

**T**atlong sundalo ang napatay nang muling magsagupa ang mga tropa ng 21st IB at isang yunit ng Lejo Cawilan Command ng Bagong Hukbong Bayan (BHB) sa Mabaca, Balbalan, Kalinga noong alas-4:20 ng hapon ng Pebrero 10. Walang kaswalti sa panig ng BHB.

Nauna nang nalagasan ang kaaway nang mapatay ang tatlong sundalo at masugatan ang dalawa pa nang tambangan ng BHB ang mga tropa ng 21st IB sa Mabaca noong Pebrero 4. Kinabukasan, nagpamiting ang 21st IB sa Sityo Kalkatan, Mabaca at nagbanta na mananagot ang mga upisyal ng barangay kapag "mabira" muli ang kanilang tropa.

Sa pangalawang labanan, halos 30 metro lamang ang pagitan ng mga Pulang mandirigma sa mga papalapit na tropa ng AFP ngunit dahil masukal ang gubat, naunang makapagpaputok ang mga Pulang mandirigma at nakuha nila ang inisyatiba sa labanan. Ang dalawang sumusunod na sundalo ay nagsitakbuhan palayo sa lugar.

Kinabukasan, pinutol ng mga sundalo ang mga ka-

hoy sa tuktok ng bundok bilang paghahanda sa paglalapagan ng helikopter. Bandang alas-1:45 ng hapon, dalawang Huey helikopter ang dumating subalit hindi ito nakalapag dahil inisnayp ng mga Pulang mandirigma. Pagbalik nito ay may kasama na itong

helikopter na MG520 na isang oras na nag-istraping at nam-bomba sa kabundukan. Tatlong beses na bumalik ang mga helikopter para maghatid ng mga suplay at kunin ang mga kaswalti ng AFP.

Nagaganap ang mga labanan sa gitna ng malakihang operasyon sa Kalinga na nag-simula nitong unang linggo ng Pebrero. Laking-batalyong mga tropa ng kaaway ang nag-ooperasyon sa mga baryo ng Mabaca, Poswoy, Balbalasang at Poblacion sa Balbalan. Mayroon ding mga nag-ooperasyong tropa sa ilang

baryo ng mga bayan ng Pinukpuk, Upper Tabuk, Lubuagan at Pasil. Kasama sa operasyon ng militar sa Baryo Dupag, Tabuk at Baryo Tanglag, Lubuagan ang mga elemento ng Cordillera People's Liberation Army at CAFGU. **AB**



## Mga taktikal na opensiba sa iba pang rehiyon

**I**sang elemento ng militar ang napatay, 5 ang nasugatan at lapat na armas ang nasamsam sa serye ng mga taktikal na opensiba ng Bagong Hukbong Bayan (BHB) nitong Pebrero.

**Pebrero 20.** Dalawang M16 at ilang kagamitang pangkomunikasyon ang nasamsam ng mga Pulang mandirigma mula sa reyd sa Port Barton Development Corp. sa Tandan Island, San Vicente, Palawan.

**Pebrero 14.** Dalawang elemento ng Citizens Armed Force Geographical Unit (CAFGU) ang nasu-

gatan nang tambangan ang mga ito ng mga Pulang mandirigma sa Barangay Banag-Banag, Sibagat, Agusan del Sur. Isang araw bago ito, napatay ang isang elemento ng 6th Scout Ranger Company nang makalaban ng kanyang yunit ang BHB sa bayan ng Buenavista, Agusan del Norte.

**Pebrero 13.** Isang sundalo ng 58th IB ang nasugatan nang pasabugan ng mga Pulang mandirigma ang isang trak ng militar sa Barangay Anibongan, Lianga, Surigao del Sur.

**Pebrero 8.** Dalawang pulis ang

nasugatan nang ambusin sila ng mga gerilya ng BHB sa Barangay Badling, Uson, Masbate. Bumibyahang ang *patrol car* na sinasakyan ng mga elemento ng Philippine National Police-Special Action Force nang hagisan ang mga ito ng eksplosibo ng mga gerilyang bayan.

**Pebrero 7.** Isang karbin, isang pistolang kalibre .45 at dalawang granada ang kinumpiska ng mga Pulang mandirigma sa isang retiradong sarhento ng Philippine Army sa Sityo Baliw, Barangay Payapag, Bacuag, Surigao del Norte. **AB**

# Usapang pangkapayapaan sa rehimeng Arroyo, sarado na

**T**uluyan nang sinarhan kapwa ng National Democratic Front of the Philippines (NDFP) at Moro Islamic Liberation Front (MILF) ang pakikipag-usap pangkapayapaan sa rehimeng Arroyo. Sinabi ng NDFP at MILF na wala nang pag-asang makapagbuo pa ng anumang kasunduan sa ilang buwan na lamang na natitira sa termino

ng rehimeng US-Arroyo. Anila, mas gusto pa nilang hintayin na lamang ang rehimeng hahalili sa kasalukuyang gubyerno.

Bukod dito, sinabi ng NDFP na kailanman ay hindi naging sinsero ang naghaharing rehimen sa pakikipagnegosasyon nito.

Nilabag ng GRP ang halos lahat ng kasunduang napagkaisahan sa

pagitan nito at ng NDFP. Pinakahuli dito ang paglabag ng rehimeng Arroyo sa kasunduang palayain ang 14 na nakadetine ng konsultant ng NDFP para makalahok ang mga ito sa nakatakda sanang usapan noong Agosto 2009. Ang pag-aresto, pag-detine at pagsasampa ng mga gawa-gawang kaso laban sa kanila ay paglabag sa JASIG na nagbibigay proteksyon at nagbabawal sa pag-aresto sa mga konsultant at istap na imbwelto sa usapang pangkapayapaan. Subalit dalawang konsultant lamang ang pinalaya at may kondisyon pa ang pagpapalaya sa isa. Kalaunan ay idineklara ng rehimen na walang matutuloy na usapan hangga't hindi pumapayag ang NDFP na unahin ang pagtalakay sa pagdidisarma, paglalansag at reintegrasyon ng Bagong Hukbong Bayan bago pa man talakayin ang mga repormang panlipunan, pang-ekonomya at pampulitika. Taliwas ito sa napagkasunduan sa The Hague Joint Declaration ng 1992.

Nitong huli, nang-intriga pa ang rehimeng Arroyo nang maglubid si Defense Secretary Norberto Gonzales ng kasinungalingan hinggil sa pagkakahati umano ng rebolusyonaryong kilusan sa pagitan ng mga pumapabor sa usapang pangkapayapaan at elektoral na pakikibaka at yaong pumapabor sa armadong pakikibaka. Ginawa namang sangkalan nina Gonzales at Annabelle Abaya ng Office of the Presidential Adviser on the Peace Process ang intrigang ito para itulak muli ang pakikipag-usap sa mga lokal na kumand ng Bagong Hukbong Bayan (BHB) at pag-alok ng "amnestiya at rehabilitasyon." Paraan lamang ito para makapagpalabas ng mga huwad na surenderi ang matataas na upisyal-militar at makurakot ang pondong "panrehabilitasyon."

Mas masahol pa, ang intriga hinggil sa pagpapaksyon umano sa loob ng rebolusyonaryong kilusan

## Mga sinasabing tagumpay ng Nolcom, pinabulaanan

**K**agila-gilalas na mga kwento ng tagumpay ang inilalabas ng Northern Luzon Command (NOLCOM) para tabunan ang mga kabiguang militar nito at ng 5th Infantry Division ng Philippine Army. Ito ang sagot ni Ka Diego Wadagan, tagapagsalita ng Agustin Begnalen Command ng Bagong Hukbong Bayan (BHB-Abra), noong Pebrero 9 sa ipinangalandakang mga tagumpay ng NOLCOM at 5th ID laban sa rebolusyonaryong kilusan sa Ilocos-Cordillera Region.

Ipinagmalaki noong ikalawang linggo ng Pebrero nina Col. Es-sel Soriano, kumander ng 503rd Brigade at Lt. Col. Rogelio Migo-te, kumander ng 50th IB, na naagaw daw ng kanilang mga sundalo ang isang malaking kampo ng BHB sa Tubo, Abra. Nakatuklas din umano ang mga sundalo ng 41st IB ng imbakan ng mga armas ng BHB sa Barangay Buneg sa Lacub.

Pinagtawanan lamang ito ng BHB dahil ang nasabing malaking kampo ay matagal nang abandonado. Ani Wadagan, wala naman talagang mga permanenteng kampo ang BHB. Hindi rin totoong nakatuklas ang tropa ng 41st IB ng nakaimbak na mga armas dahil walang labis na mga baril ang BHB sa dami ng mga narerekut nito.

Ang totoo'y naglulubid lamang ng mga kwento ang mga upisyal ng militar para tabunan ang kanilang mga kaswalti sa labanan, ani Wadagan. Halos isang dibisyong tropa ang ibinuho ng NOLCOM gamit ang mga eroplano't helikopter ng Philippine Air Force sa isang malawakang operasyong militar para tugisin ang BHB noong Enero 27 hanggang Pebrero 4. Sa kabila ng pwersang ito, umabot sa 29 sundalo ang napatay at 35 ang nasugatan sa mga labanan sa bayan pa lamang ng Malibcong, Abra. Bukod pa ito sa mga kagamitang militar na nasamsam at nasira sa mga kontra-atake ng mga yunit ng BHB sa iba't ibang lugar ng Cordillera.

AB

ay hudyat ng pag-iibayo ng mga ekstrahudisyal na pagpatay at iba pang paglabag sa karapatang-tao. Ang mga biktima ay ilalarawan na naman bilang kaswalti umano ng purgahan.

Ani Fidel Agcaoili, tagapangulo ng NDFP Human Rights Committee, hindi interesado ang rehimeng Arroyo sa negosasyong pangkapayapaang may layong lutasin ang mga ugat ng armadong tunggalian at magluluwal ng repormang panlipunan, pang-ekonomiya at pampulitika sa bansa.

Sa panig naman ng MILF, ilang ulit na silang pinangakuan ng rehimeng Arroyo na pagbibigyan ang kanilang kahilingan para sa tunay na awtonomya. Subalit palagi na lamang silang inaalok ng "pinaunlad na awtonomya" sa makitid na balangkas ng Autonomous Region in Muslim Mindanao. Nitong Pebrero ay pangatlong beses na nagbalangkas ng borador hinggil sa "pinaunlad na awtonomya" ang *peace panel* ng rehimeng Arroyo na nakikipag-usap sa MILF.

Dahil malinaw na wala silang mararating, tumanggi na ang MILF na humarap sa usapan. Anang MILF, kung sadyang walang salubungan na maaaring mangyari ngayon, hihintayin na lamang nila ang susunod na rehimen na maaaring makausap nang mas ser-yoso. **AB**

## Singil ng Meralco, sumobra nang P7 bilyon

SOBRA ng P7.01 bilyon ang siningil ng Manila Electric Co. (Meralco) sa mga kliyente nito, ayon sa Commission on Audit (COA). Ayon sa COA, sumobra ng P1.68 bilyon ang singil ng Meralco noong 2004 at P5.33 bilyon noong 2007.

Anang COA, nangyari ito dahil isinama ng Meralco sa mga gastos sa operasyong ipinasa nito sa mga konsyumer ng kuryente ang ginugol ng kumpanya para sa ilang ari-arian at makinarya na hindi naman ginamit sa paglikha o distribusyon ng kuryente.

Kabilang sa mga ginastusan ng Meralco na hindi pinayagan ng COA na bawiin ng kumpanya mula sa mga konsyumer ang konstruksyon ng isang sapa at paradahan ng sasakyan na isang kilometro pa ang layo mula sa upisina ng Meralco, mga pensyon ng mga empleyado at malalaking sweldo at benepisyo ng mga ehekutibo nito.

Hindi ito ang unang pagkakataon na sumingil ng sobra ang Meralco. Noong 2003, inutusan ng Korte Suprema ang Meralco na ibalik sa mga konsyumer nito ang P30 bilyong sobra sa mga siningil nito dahil ibinilang ng kumpanya sa mga gastos umano nito sa operasyon ang buwis na binabayaran nito.

Ang awdit ng Meralco ay iniutos ng Korte Suprema matapos magpetisyon ang Meralco noong 2004 na magtaas ng singil sa kuryente.

Nagagawa ng Meralco ang lahat ng pang-aabusong ito dahil sa ilalim ng Electric Power Industry Reform Act (EPIRA), napagtibay ang pribadong monopolyong kontrol nito at pinahihintulutan itong kumamal ng malaking ganansya. Ang EPIRA ay resulta ng pagtataguyod ng rehimeng Arroyo ng mga patakaran ng liberalisasyon, deregulasyon at pribatisasyon.

Samantala, nakatak dang tumaas na naman ang singil sa kuryente sa Marso. Kinukundisyon na ng Meralco ang isip ng publiko sa nagbabadyang pagtaas pa ng mga bayarin sa kuryente bunga umano ng umiiral na tagtuyot. Dahil sa kakulangan ng tubig-ulan, bumababa na raw ang lebel ng tubig sa mga dam at nagkukulang na ang bolyum ng tubig na nagpapaandar sa mga *hydroelectric* na planta ng kuryente.

Sa ngayon ay dumadalas na ang mga *brownout* laluna sa Luzon at Mindanao. Nagpahiwatig na ang Meralco na kung nais ng mga konsyumer na iwasan ang *brownout*, dapat tanggapin nila ang pagtaas ng singil sa kuryente. **AB**

## Mga residente ng Laguna de Bay, naglunsad ng karaban

NAGLUNSAD ng sariling karaban ang mga mangingisda, magsasaka at mga biktima ng bagyong Ondoy na naninirahan malapit sa Laguna de Bay noong Pebrero 9 para bigyang-suporta ang mga progresibong kandidato at partidong nagdadala ng kanilang mga interes sa loob at labas ng Kongreso.

Pinamunuan ang karaban ng Pambansang Lakas ng Kilusang Mamamalakaya ng Pilipinas (PAMALAKAYA), Katipunan ng Samahang Magbubukid ng Timog Kata-

galugan (Kasama-TK) at ng multisektoral na Save Laguna Lake Movement. Nagsimula ang karaban sa bayan ng Jalajala at nagtapos sa Lupang Arenda sa bayan ng Taytay, Rizal.

Sumama sa pagkilos na ito ang sampung pampasaherong dyip na nagtataglay ng pangkampanyang istri-mer ng mga progresibong kandidatong tumatakbong senador na sina Satur Ocampo at Liza Maza at mga partidong Bayan Muna, Anakpawis, Gabriela Women's Party at Kabataan Partylist. **AB**

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 4  
Pebrero 21, 2010  
[www.philippinerevolution.net](http://www.philippinerevolution.net)

*Editorial*

## Mga rebolusyonaryong tungkulin sa panahon ng eleksyon


**A**ng mga eleksyon sa ilalim ng bulok na naghaharing reaksyunaryong estado at sistema ay huwad at palaging batbat ng anomalya at karahasan. Ang mga ito ay konsentradong paligsahan ng lakas, salapi at mga maniobra ng magkakaribal na elitistang paksyon sa papet na reaksyunaryong paghahari. Karahasan, panunuhol at pandaraya ang pinakasusi sa likod ng tagumpay.

Hindi ito tunay na demokratikong proseso at hindi sumasalamin sa tunay na interes ng sambayanan.

Mistula itong malaking karnabal na pang-aliw sa mamamayan. Sinasamantala nito ang kanilang kahirapan at inaakit sila ng pera at ibang materyal na bagay para makuha ang kanilang boto. Ang pagboto nila ay nagagamit na palamuti para pagmukhaing demokratiko ang proseso. Habang napaaasa pa ang mamamayan sa mga reaksyunaryong eleksyon, malaking mayorya pa rin ang napalalahok dito.

Gayunman, sa limitadong antas na kakayanin sa ilalim ng reaksyunaryong estado at sistema, maaari at mahalaga pa ring masamantala ang mga reaksyunaryong eleksyon upang makakuha ng mga konkretong pakinabang sa interes ng mamamayan at ng rebolusyonaryong kilusan. Tungkulin ng mga rebolusyonaryong pwersa na masusing gabayan ang mamamayan sa pagkilos sa mga reaksyunaryong halalan.

Inilapat ng rebolusyonaryong kilusan ang dalawahang taktika sa mga panahon ng reaksyunaryong eleksyon. Saligang tungkulin nitong ilantad ang kahungkagan ng mga reaksyunaryong eleksyon at ang kabulukan ng kinapapalooban nitong sistema. Binibigyang-diin ang armadong pakikibaka bilang tiyak at pangunahing paraan ng pag-agaw sa kapangyarihang pampolitika upang makamit ang pundamental at ganap na panlipunang pagbabago.



***Mga tampok sa isyung ito...***

**Dalawang kaso ng pang-aagaw ng lupa**  
PAHINA 5

**Malawakang suporta sa Morong 43**  
PAHINA 7

**Usapang pangkapayapaan sa rehimen, sarado na**  
PAHINA 11

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)